



WURZENGRABER
KÄMMERLI
BASEL

Jooresbricht 2019

Liebi Wurzegrabber

I dörf s'erschte Mool e Jooresbricht vom Wurzegrabberkämmerli verläse. Natürlich probier ich nit mini Vorgänger wie dr Ricky oder der Felix Eymaa z'kopiere. Ich red weder in Värform no immene absolut stilsichere Dialägg. Ganz eifach so wie mir dr Schnabel gwachse isch.

Sit letschter GV hänn sich e paar Sache veränderet. So isch für dr Ricky Hubler dr Marc Siegrist und für der Guuge seelig, si Sohn, dr Patrick neu in Vorstand gwählt worde. Mir hänn intärn folgendi Charcheverteilig vorgnoh. Dr Urs Lüscher blibt unsere Präsident und dr Sven Hoffmann macht nach wie vor d'Kasse, wenn au nur no bis zum hüttige Datum. Dr Michi Schär isch zwar nit neu uffgnoh, är isch aber unsere neue Schriiber. Um Mutatione und d'Mitgliederbewegig, uf Neudütsch „Membership Management“ kümmeret sich dr Marc Siegrist. Dr neu gwählt Patrick Stalder und dr Daniel Brunner kümmeret sich für's Programm vum Herrenooobe. Zuesätzlig verstöhn mir dr Daniel Brunner au als Biisitzer, wo hilft, wens brennt und wo luegt, dass mir alli unseri Sache rächt mache. Ich sälber ha d'Charge vum Vizepräsident dörfe überneh.

Sit der letschte Generalversammlig isch nümme viil gloffe. Näbe drei Vorstandssitzige und dr Tischverloosig sin mir mit Vollgas in HerrenOobe 2019. Dr Daniel und dr Patrick hänn dä Oobe hervorragend organisiert. Es hett e paar Änderige im Programm gäh. So zum Bischpiel isch dr Ilmarsch vum Vorstand vo der Nachtfalterschränzer us Prattele begleitet worde, bevor die exzelänti Gugge no e paar Stückli zum Beschte gäh hänn. Mit däre Massnahm isch dr Oobe bereits beschtens lanciert worde. Als näggschts isch Sirius Brass uffträtte. Ganz plötzlig isch es ruhig worde im Saal. Die meischte Aawäsende hänn gmerggt, was do für e Top Qualität uf dr Bühni gschande isch. E mänge Musiker inklusiver mir sälber hänn sich in sällem Momänt übeleggt, s eigene Instrumänt an Nagel z'hängge. Als Kontrapunkt sin denne

dr'Danny and the two Toms mit ihrem eigene Hillibilli und Rock'n'roll Stil ufträtte. Si hänn nit minder Erfolg kha, um so meh, si nach em Aalass no in dr Brasserie zur Bierschwemmi uffträtte sin. Durchs Programm gfiehrt hett dr Adrian Plachesi in siinere ruhige und aaschtändige Art. Nit z'vergässe natürligg unseri Huusband Moody Tunes unter dr Leitig von Christian Müller wo uns Joor für Joor beschtens unterhaltet.

Gässe und drungge hämmer aaschtändig. Em Huusherr Martin Reinshagen und seiner Crew sei gedankt. S Personal isch meischtens uffmerksam gsi und het genau das gmacht was dr Chef het welle. So zum Bischpiil hetts zum „normale“ Why nur „normali Whygleeser gäh, und wehe s'het öpper e bessers Glas welle, isch ihm scho fascht e Lokalverbot aadroht worde. So verwunderets au nit, dass e paar Gleetzi die Glanzidee kha hänn, Whigleeser mit Hilf vo Hitz um zforme. Eigentlig nüt Schlimms. Aber us dr Sicht vum Beizer e mittleri Katastrophe. Mir hänn imenne persönligg Gschpräch alles wieder gradbooge.

Am Oobe het dr Päsident folgendi persönligg Gescht könne begriesse:

Patrick Stalder – Patrick Schaub
Daniel Brunner – Lars Eikenberg
Sven Hoffmann - Markus Köhler
Urs Lüscher – Schibbe Schaub
Michael Schär – Pascal Bender
Marc Siegrist – Oliver Hediger
Christoph Seibert- Patrick Lammer

Als Ehregascht hett uns dr Roger Brennwald beehrt. Si kárnigi und wirgligg luschtigi Aasproch hett si Aend gfunde, indäm är alli Wurzegrabber mit Partnerinne ans kommende Swiss Indoors 2019 iiglaade het. E riese grossi Geste, die mir selbstverständligg wohr nämme.
Härzligge Dangg Roger

Am HerrenOobe 2019 hämmer folgendi 8 Herre neu üffnäh könne:

Patrick Cattin, Theodor Hillhorst, Dominik Prétôt, Dominik Reber, Maurice Reber,
Jacov Wirtz, Cédric Robin, Gian Panosetti

Nach dr usgibige Bierschwemmi und diverse Beizebsiech, isch au dä HerrenOobe langsam z'Änd gange.

Mir hänn e schöne Friehlig dürfe gniesse, bis mir vum überraschende und plötzlige Tod vo unserem Kämmerlifründ, ehemaligs Vorstandsmitglied und Papi vum Patrick und vum Matthias und Brueder vum Peter, em Guuge Stalder erfahre hänn. So überraschend, das haut eim scho um. Mir wünsche de ängschte Verwandte viel Kraft und au Zueversicht, die kommendi Zyt z' meischtere. Guuge du fählsch uns. Mir vermisse Di.

An dr Abdanggig vum 14. Mai 2019 hann ich einigi Wurzegeber gseh. Dr Vorstand und dr Ricky Hubler hänn sich mit eme Kranz bemerkbar gmacht. Allne e hätzliggs Danggschön wo drbi gsi sin. Wies dr Guuge au nit anderscht hätti welle, sin mir nach em Apéro im Lamm no ins Schoofegg und nochhär an Maibock ins Volggshuus gange.

Fürs vergangeni Joor danggt dr Vorstand allne Wurzegeber fürs pünktligge Yzahle und die wos noonig gmacht hänn fürs baldige Yzahle vom Mitgliederbiitrag. Mir freue uns als neu zämmegsetzte Vorstand uff unseri witeri Uffgoobe und mir versueche, Euch voll und ganz zfriede d'stelle. Als Letschts könne mir nit gnueg dra erinnere, dass mir no Platz hänn und dass sich doch alli Wurzegeber Fründe um neu Mitglieder sölle bemiehe.

In däm Sinn dörf ich jetze abschliesse und Euch witerhin e erfolgrichs Joor wünsche.